

O Aoaoga o Aso Nei e Fesootai i le Tagavai o le Saolotoga

“Mo le manatuaina o lo tatou Atua”

Ua aoao mai Elder Neil L. Andersen o le Korama a Aposetolo e Toasefululua:



E toatele o i le lalolagi e itiiti so latou iloa e uiga ia Iesu Keriso, ma i nisi vaega o le lalolagi lea sa folafolaina ai Lona suafa mo le tele o seneturi, ua faaitiitia le faatuatua ia Iesu Keriso. . . .

A o faaitiitia le tautatala o le lalolagi e uiga ia Iesu Keriso, e ao ina faateleina lo tatou tautatala e uiga ia te Ia. A o faaali atu o tatou lanu (uiga) moni o ni Ona soo, o le toatele o loo siomia i tatou o le a saunia e faalogo. (Neil L. Andersen, “Ua Matou Tautalatala e uiga ia Keriso,” *Liahona*, Nov. 2020, 88, 90)

“Mo le manatuaina o . . . Ia tatou tapuaiga”

Sa aoao mai Peresitene Dallin H. Oaks o le Au Peresitene Sili:



Afai tatou te taofia le faatauaina o a tatou lotu mo soo se mafuaaga, ua tatou faamata'uina lo tatou olaga patino faaleagaga, ma o aofaiga iloga o tagata ua vavaeeseina i latou lava mai le Atua ua faaitiitia ai Ana faamanuiaga i o tatou malo.

O le auai ma le toaaga i se lotu e fesoasoani lea ia i tatou ia avea ma ni tagata lelei atu ma ni tosinaga lelei atu i olaga o isi. I le lotu ua a'oa'oina ai i tatou i le auala e faaaogaina ai mataupu faavae faalelotu. Tatou te a'oa'o mai le tasi mai le isi. . . .

. . . Ou te tatalo ia tatou tumau mausali i nei aafiaga faaleEkalesia a o tatou sailia le ola e faavavau, o le meaalofa silisili o meaalofa uma a le Atua. (Dallin H. Oaks, “O Le Manaomia o se Ekalesia,” *Liahona*, Nov. 2021, 24, 26)

“Mo le manatuaina o lo tatou . . . saolotoga”

Na aoao mai Elder Ronald A. Rasband o le Korama a Aposetolo e Toasefululua:



O le a le saolotoga faaletapuaiga?

O le saolotoga e tapuai ai i ona ituaiga eseese uma: saolotoga e faapotopoto ai, saolotoga e tautala ai, saolotoga e faatino ai talitonuga faaletagata lava ia, ma le saolotoga mo isi e faia ai foi nā mea uma. O le saolotoga faaletapuaiga e mafai ai e i tatou taitoatasi ona filifili mo i tatou lava le mea tatou te talitonu i ai, pe faapefea ona tatou ola ma faatino e tusa ai ma lo tatou faatuatua, ma le mea o faamoemoeina mai e le Atua ia i tatou. . . .

Ou te valaaulia outou ia taulamua i le faamoemoe o le saolotoga o tapuaiga. O se faailoaga o le mataupu faavae o le faitalia na tuuina mai e le Atua.

O le saolotoga faaletapuaiga e aumaia ai le fuataga tatau i filosofia faatautavā. O le lelei o tapuaiga, o lona aafiaga lelei lautele, ma faatinoga o le alofa i aso taitasi lea e na o tapuaiga e faaosofia ai, e na o le faateleina pe a tatou puipuia le saolotoga e faaali atu ai ma faatino i luga o talitonuga autu. (Ronald A. Rasband, “Ia Faamaloloina le Lalolagi,” *Liahona*, Me 2022, 91, 93)

“Mo le manatuaina o . . . lo tatou filemu”

Na aoao mai Elder Jeffrey R. Holland o le Korama a Aposetolo e Toasefululua:



O le Foma'i o manu'a uma, o Lē e faasa'oina mea sesē uma, ua augani mai ia i tatou ia galulue faatasi ma ia i le galuega faigata o le faatupuina o le filemu i se lalolagi e na te lē mauaina i se isi lava ala. . . .

. . . Ou te talosagaina ai outou ia avea ma ē e faatupu le filemu—ia fiafia i le filemu, ia saili le filemu, ia fatuina le filemu, ma ia opogi le filemu. Ou te faia lena talosaga i le suafa o le Aloalii o le Filemu. (Jeffrey R. Holland, “O le Galuega o le Faaleleiga,” *Liahona*, Nov. 2018, 79)

“Mo le manatuaina o . . . ō tatou [aiga]”

Na aoao mai e Sister Bonnie L. Oscarson, o lē sa avea ma Peresitene Aoao o Tamaitai Talavou:



O tagata uma, e tusa lava po o a o latou tulaga faaleulugalii poo le aofai o le fanau, e mafai ona avea ma ē e puipuia le fuafuaga a le Alii o loo faamatala mai i le folafolaga o le aiga. Afai o le fuafuaga lea a le Alii, e tatau foi ona avea ma a tatou fuafuaga! . . .

. . . Ia tatou fesoasoani e fausia le malo o le Atua i le tulai lea i luga ma le lototoa ma le avea ai ma tagata e puipuia le faaipoipoga, tulaga faamatua, ma le aiga. E manaomia i tatou e le Alii ia avea ma autau lotototoa, tumau, ma lē mafaagaetia o ē o le a puipuia Lana fuafuaga ma aoao atu Ana upumoni i augatupulaga o i le lumanai. (Bonnie L. Oscarson, “O Tagata e Puipuia le Folafolaga,” *Liahona*, Me 2015, 15, 17)